

**Uunga siunnersuut: Erngup nukingata nukissiornermut atorpeqartarnera pillugu  
Inatsisartut inatsisaat nr. xx, xx. xxx 2018-imeersoq.**

(Inuussutissarsiornermut Nukissiuuteqarnermullu Naalakkersuisoq)

**Akissuteqaat**

(Inuussutissarsiornermut Nukissiuuteqarnermullu Naalakkersuisoq)

**Aappassaanneerpeqarnera**

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq sukumiisumik isumaliutissiissuteqarneranut qutsavigaara.

Naalakkersuisut maluginiarpaat ataatsimiititaliap isumaqatigiittup siunnersuutip akuerineqarnissaa inassutigigaat aammalu ataavartunik nukissiuuteqarnissaq inuiaqatigiit kalaallit sapinngisamik annertunerpaamik aalluttariaqaraat, tamarmik isumaqatigiissutigigaat.

Sinerissami erngup nukinganit nukissiorfinnut siusinnerusukkut sanaartornissamut pilersaarusiornerit killiffii ataatsimiititaliap ujartorai, Naalakkersuisut taamatuttaaq maluginiarpaat.

Tamanna pillugu oqaatigisinnaavara Aasiaat/Qasigiannugit, Maniitsup, Paamiut aamma Nanortallip eqqaani sumiiffiit, erngup nukinga atorlugu nukissiamik pilersuinerup annertusitinnerani teknologiikkut periarfissat aamma inuiaqatigiit aningaasaqarnerannut tunngasortaasa misissorneqarnissaat siunertaralugu, erseqqinnerusumik misissorneqartut.

Tamatuma saniatigut oqaatigineqarsinnaavoq, Maniitsumi suliassami ingerlaqqinnissamut maannakkorpiat periarfissaqanngitsoq, Alcoa nalunaarsimammat. Taamaattumik soqutiginnittut allat, nukissiornerup niuerneramik tunngaveqartumik atorluarneqarnissaa siunertaralugu, sumiiffimmi erngup nukinganit nukissiorfiliornissamut ingerlatsinissamullu akuersissummik qinnuteqarsinnaapput.

Tassunga atatillugu oqaatigineqarsinnaavoq Namminersorlutik Oqartussat aamma Alcoa isumaqatigiissuteqarmata, tamatuma kingunerisaanik allat misissuinermi paasissutissanik nalunaarsukkanik, erngup nukinganit periarfissaqarfiusunut pineqartunut tunngatillugu Alcoa aamma Namminersorlutik Oqartussat ataatsimoorlutik katersorsimasaannik,

pissarsisinnaallutik. Paasissutissanut najoqqutassat suliffissuaqarnermi suliassamut aalajangersimasumik atorneqarnerat, aningaasartuutit Alcoap aamma Namminersorlutik Oqartussat paasissutissanut najoqqutassanik katersinermut ataatillugu aningaasartuutigisimasaasa, matusserneqarnerisigut pisinnaavoq. Ilaatigut erngup nukinganit periarfissaqarfiusut taamaattut Naalakkersuisut ukiuni aggersuni suliffissuarnut nukissiamik annertuumik atuisunut, ilanngullugit paasissusissanut nalunaarsukkanut sullisiivinni suliaqartut, nittarsaatissamaarpaat.

Nukissiamik imermillu pilersuinermit Suliassaqarfimmut pilersaarummi allassimasutut, erngup nukingata saniatigut nukissiornerit allat misissorneqarput. Pinngortitaq ataavartumik nukissiornissamut amerlasuunik periarfissaqartitsivoq, assersuutigalugu seqineq aamma anori. Nukissiamik pilersuineq erngup nukinganik taamaallaat aallaaveqartinneqarsinnaanngilaq, taamaattumillu ataavartumik nukissiornermi teknologiit allat siuarsarneqassapput misilerarneqassallutillu. Ukiuni sisamani tulliuttuni, Nukissiamik imermillu pilersuinermit Suliassaqarfimmut pilersaarummit 2030-imi nukissianut ataavartunut ikaarsaarnissaq pillugu anguniakkat tunngavissinneqarnissaat siunertaralugu, nunarput tamakkerlugu nukissiorfissanit ataavartunit uuttortaanerit ingerlanneqassapput .

Taamatut oqaaseqarlunga matuma kingorna Naalakkersuisut sinnerlugit siunnersuut akuerineqassasoq inassutigaaara.